

ACTA DA SESIÓN ORDINARIA CELEBRADA POLA COMISIÓN INFORMATIVA PERMANENTE DE URBANISMO, VIVENDA, INFRAESTRUTURAS, PARQUES E XARDÍNS E MEDIO AMBIENTE O DÍA 21 DE XUÑO DE 2013 ÁS 12:00 HORAS.

Sendo as doce horas (12:00) do día 21 de xuño de 2013, reúnese en sesión ordinaria convocada ao efecto a Comisión Informativa Permanente de Urbanismo, Vivenda, Infraestruturas, Parques e Xardíns e Medio Ambiente, coa asistencia das/os concelleiras/os que de seguido se indican.

Concelleiras/os asistentes:

Vocais:

Grupo municipal popular

Santiago V. Amor Barreiro

Alfredo Taboada Alvelo

Grupo municipal socialista

José Manuel Miñones Conde

José Francisco Doval Galán

Concelleiras/os non adscritas/os

Susana Mallo Redondo

Xosé Anxo Doval Rey

M^a Dolores Fernández Álvarez

Manuel J. Ferreiro Santiago

Alfonso Rey López

Emilio Martínez Carballeira

Ramón García Argibay

Presidente: Don Alfredo Taboada Alvelo

Secretaria accidental: Dona Concepción Vilas Cantelar.

ORDE DO DÍA:

Punto primeiro.- Aprobación, se procede, de actas anteriores.

A acta correspondente á sesión do 24 de maio de 2013 resulta aprobada por maioría absoluta dos membros presentes, coa abstención de don José Francisco Doval Galán por non ter estado presente nesa sesión.

Punto segundo.- Resolución de alegacións e aprobación definitiva do expediente de desafectación de parcela de titularidade municipal sita no Milladoiro para a súa posterior transmisión en propiedade ao Arcebispado de Santiago de Compostela.

O señor alcalde informa que figuran no expediente as dúas alegacións presentadas, así como os informes preceptivos, que propoñen a súa desestimación.

Intervén don **Xosé Anxo Doval Rey** para indicar, substancialmente, a conformidade co fondo das alegacións, lembrando que xa foran manifestadas no pleno as reticencias do seu grupo ao respecto deste punto e anunciando a súa abstención.

Tras un breve cambio de impresións o asunto é ditaminado favorablemente cos votos a favor dos membros do grupo municipal popular e a abstención dos demais asistentes á comisión informativa.

Punto terceiro.- Participación do Concello de Ames na convocatoria da concesión dos Premios Reina Sofía 2013, de accesibilidade universal de municipios, do Real Patronato sobre Discapacidade do Ministerio de Sanidade, Servizos Sociais e Igualdade.

Informa substancialmente o señor **alcalde** que á vista da convocatoria dos premios Reina Sofía 2013, de accesibilidade universal de municipios, do Real Patronato sobre Discapacidade do Ministerio de Sanidade, Servizos Sociais e Igualdade, decidiuse participar coas actuacións que no ano 2011 se fixeron na Casa da Cultura de Bertamirás,

dirixidas á eliminación de barreiras arquitectónicas.

Intervén a secretaria accidental dona **Concepción Vilas Cantelar** para explicar, substancialmente, que o prazo de solicitude remata o próximo domingo, que o luns é festivo en Galicia, e que en todo caso non daba tempo a que se aprobase a solicitude no Pleno ordinario, polo que se optou por facer a solicitude por decreto da Alcaldía e solicitar a ratificación posterior no pleno da concorrencia ao premio, motivo polo cal se envía no día de hoxe a solicitude de convocatoria, a expensas de engadir con posterioridade o acordo plenario e en todo caso a documentación que fose requirida.

Don **Xosé Anxo Doval Rey** se interesa por se o premio se outorga a unha actuación concreta ou ás actuacións en xeral do concello sobre accesibilidade, respondendo o señor **alcalde** que independentemente de que a convocatoria se refira a este último extremo, se vai tentar entrar nesta convocatoria por esta actuación concreta.

Pregunta dona **Mª Dolores Fernández Álvarez** polo motivo de non ter levado este asunto ao pleno de maio, sendo a convocatoria anterior, respondendo o señor alcalde que a elaboración da documentación precisa por parte dos técnicos leva tempo.

Intervén don **Emilio Martínez Carballeira** para dicir, substancialmente, que xa non é este o primeiro caso en que se traen asuntos a aprobación no límite dos prazos, opinando que hai que actuar con mais tempo e organizar e planificar mellor para evitar estes apuros de última hora.

Polo grupo municipal socialista intervén don **José Manuel Miñones Conde** para, substancialmente, incidir no manifestado polo señor Doval Rey, indicando que no obxecto e na finalidade da convocatoria se indica que se premiará a un labor continuado na materia de accesibilidade, preguntando a razón para incluír só unha actuación, téndose feito nos últimos cinco anos varias obras neste ámbito, así como o traballo en sistemas de información, todo o cal debería ser incluído na solicitude.

Contesta o señor **alcalde** que esta foi a opción que a técnica encargada destes asuntos nos últimos anos entendeu como mais indicada para presentar.

Polo grupo municipal socialista intervén don **José Francisco Doval Galán** para ratificar o manifestado polo señor Miñones, enumerando varias obras realizadas en anos anteriores a este respecto.

Don **José Manuel Miñones Conde** intervén para, substancialmente, indicar que debería prevalecer o criterio do goberno sobre o da técnica, sinalando que o seu grupo tería actuado de outro xeito, ao que o señor **alcalde** reitera que segundo a técnica é esta obra a que ten mais posibilidades de ser susceptible de entrar na convocatoria.

Se interesa don **Emilio Martínez Carballeira** polo feito de que non se lles trasladaran este asunto cando saíu a convocatoria e as indicacións da técnica, pois non se lles deu pé a opinar con tempo, respondendo o señor alcalde que xa se está plantexando agora e que as convocatorias son públicas, preguntando aos presentes se hai mais intervencións respecto deste punto.

Tras un breve cambio de impresións o asunto é ditaminado favorablemente cos votos a favor dos membros do grupo municipal popular e a abstención do resto dos asistentes á comisión informativa.

E non habendo mais asuntos de que tratar o señor presidente da por rematada a sesión ás doce horas e dez minutos do día de referencia de todo o que eu como secretaria accidental certifico.